



Gemeinsam Äntwert vum Här Minister fir sozial Sécherheet a vun der Gesondheitsministesch op d'parlamentaresch Fro n°8222 vum 9. August 2023 vum honorabelen Deputéierten Här Sven Clement iwwert d'Confédération Européenne d'Experts en Évaluation et Réparation du Dommage Corporel

1. Op Basis vu wéi enger reglementéierter Nomenclature a wéi enge Critères d'appréciations ginn d'Ënnersichunge beim CMSS gemaach? Gëllt hei och de Barème médical aus dem Reglement vum 10. Juni 2013 oder gëtt et eng aner legal Basis?

D'Ënnersichunge beim Kontrolldéngscht vun der sozialer Sécherheet (CMSS), wéi dat an der Medezin iwwerall Usus ass, ginn net op Basis vun enger reglementéierter Nomenclature gemaach. Fir déi medezinesch Ënnersichung gëllen déi selwecht Standarde wéi se am Medezinstudium geléiert ginn an dono an der deeglecher Praxis ugewannt ginn. Do ënnerscheet de Kontrolldokter vum CMSS sech net vun all anerem Dokter dee mat kranken, bezéiungsweis verletzte Persoune schafft. D'Appreciationskrittäre sinn ebenfals déi, di an der jeeweils aktueller medezinescher Wëssenschaft gëllen. D'groussherzoglecht Reglement vum 10. Juni 2013 ass applicabel an der Onfallversécherung a gëllt do selbstverständlech als legal Basis.

Falls de Barème vun 2013 gëllt: Mussen ëmmer all d'Krittären genotzt ginn? Bzw. ass et dem Dokter oder der Doktesch beim CMSS iwwerlooss, zousätzlech zum Reglement vum 10. Juni 2013 weider Krittären ze consideréieren, bzw. d'Krittäre jee no Fall liicht unzepassen oder Krittären ewesch ze loossen?

Dat gëtt vu Fall zu Fall gekuckt; eng Verallgemengung gëtt et och hei net vu dat net all Fall onbedéngt identesch ass, bezéiungsweis et (medezinesch) Ënnerscheeder ginn. Wat d'Krankeversécherung an d'Pensiounsversécherung betrëfft, ass den ugeschwate Barème (CEREDOC) net gesetzlech bindend; et ass ee Barème vu ville mat deem de CMSS schafft. Do ginn et zum Beispill déi offiziell franséisch an däitsch gesetzlech festgeluechte Barèmen, wéi och zum Beispill dee ganz bekannte Barème vum "Concours médical", enger franséischer Fachzäitschrëft. Dann stinn dem CMSS eng ganz Rei medezinesch Fachbicher a Fachzäitschrëften zur Verfügung, déi ganz aktuell sech ëmmer nees mam Thema vun der Evaluatioun, bezéiungsweis der medezinescher Expertise befaassen. Et ass och wichteg ze wëssen, dass d'Zuelen an engem Barème och ëmmer nëmmen eng Forschette uginn am Kader vun därer den Expert sech beweegt an och eventuell doriwwer eraus geet. Et ass jo gewosst, dass d'Medezin keng exakt Wëssenschaft ass an all Fall anescht riskéiert ze sinn.

Falls et fir d'Ënnersichunge beim CMSS quer keng eenheetlech Richtlinne gëtt: Sinn d'Cellule d'expertise médicale oder en anere Service bei der Santé beoptraagt ginn, dës auszeschaffen?

Weder d'Cellule d'expertise médicale (CEM) nach en Service bei der Direktioun vun der Santé sinn hei kompetent. Et gëtt awer eng Zesummenaarbecht mat engem Vertrieeder vum Contrôle médical wat Krittäre fir de Statut vum "Salarié handicapé" ubelaangt. De Representant vun der Santé assuréiert d'Presidentschaft vun der medezinescher Kommissioun vum Handicap vum Aarbechtsministère. An engem interne Reglement vun dëser medezinescher Kommissioun ass festgehalten, dass déi 5 Memberen sech op verschidde Barèmmë stäipe fir hir Decisioun ze huelen op ee Salarié dëse Statut kritt oder net.



Folgend Barèmmë ginn dofir benotzt:

- Barème médical applicable à l'assurance Accident (RGD du 10/06/2013) ;
- Barème d'évaluation médico-légale français de la société de médecine légale et de Criminologie de France et de l'Association des médecins experts en dommages corporels ;
- Barème indicatif d'évaluation des taux d'incapacité en droit commun du Concours médical ;
- Evaluation du Handicap et du Dommage corporel du Dr. L. Melennec ;
- Barème européen d'évaluation des atteintes à l'intégrité physique et psychique.

Déi medezinesch Kommissioun muss verschidde Barèmmë benotze well net all Krankheet a Sequelle vun Accidenter ausféierlech behandelt ginn an engem eenzege Barème.

2. Wéi wäit sinn d'Harmoniséierungsbeméiunge bei der Elaboratioun vun engem Guide unique fir kierperlech Aschränkungen an den domat verbonne finanziellen Entschiedegungen vun der Confédération Européenne d'Experts en Évaluation et Réparation du Dommage Corporel (CEREDOC)?

Bréngt Lëtzebuerg sech an dës Aarbechten an a falls jo, wéi?

Sinn d'Cellule d'expertise médicale oder d'Santé un den Aarbechten bedeelegt?

Weder dem Ministère vun der sozialer Sécherheet, nach den zoustännege Verwaltungen an Institutiounen sinn esou Harmoniséierungsbeméiunge bekannt. An dësem Kader ass et net oninteressant ze wëssen dass et déi éischt an déi lescht Versioun vun dem Barème vun der CEREDOC, 2010 gouf. Dës Barème ass och net en offizielle Barème vun der europäescher Unioun. Dës Barème ersetzt och net déi offiziell per Gesetz definéiert Barèmmen aus den Nopeschlänner.

Laut den Informatiounen, déi dem Ministère fir sozial Sécherheet zur Verfügung stinn, ass de CEREDOC eng Confédératioun déi verschidden national Associatiounen vereent, mee keng offiziell EU-Institutioun oder Änlech.

Weder de CMSS, nach d'CEM oder d'Association vun der Onfallversécherung sinn am CEREDOC vertraueden. De Ministère fir sozial Sécherheet huet net Kenntnis vun enger Lëtzebuenger Associatioun oder soss eng Verwaltung déi am CEREDOC vertraueden ass. Dës gëllt och fir de Gesondheitsministère.

3. Ginn et Harmoniséierungsbeméiunge vu Säite vu Lëtzebuerg fir d'Barèmes médicales fir d'medezinesch Kontrollen am Beräich vun der Sécurité sociale op europäeschem Niveau unzegläichen?

Falls jo: Wou sinn d'Aarbechten drun a wat fir eng Roll spillt Lëtzebuerg?

Sinn d'Cellule d'expertise médicale oder d'Santé un den Aarbechten bedeelegt?

Laut den Informatiounen, déi dem Ministère vun der sozialer Sécherheet esou wéi dem Gesondheitsministère zur Verfügung stinn, ginn et am Moment op europäeschem Niveau keng Harmoniséierungsbeméiungen op dësem Punkt. Dobäi muss een och präziséieren dat d'sozial Sécherheet eng national Kompetenz ass. Legal bindend Krittere missten also an der nationaler Gesetzgebung verankert ginn.



Lëtzebuerg, den 11. September 2023

De Minister fir sozial Sécherheet

(s.) Claude Haagen